

Suliffeqarfinit eqqakkanut Qeqqata Kommuniata maleruaqqusaa

Suliffeqarfinit eqqakkanut Qeqqata Kommuniata maleruaqqusaa

Avatangiisit innarlitsaaliorneqarnissaanik Inatsisartut inatsisaat nr. 9, 22. november 2011-meersumi, Inatsisartut inatsisaat nr. 16, 1. december 2021-meersumi allangortinneqartumi § 36, imm. 3, § 39, imm. 1 aamma § 66, imm. 3 kiisalu Eqqakkat pillugit Namminersorlutik Oqartussat nalunaarutaat nr. 3, 7. januar 2021-meersumi §§ 18-20 naapertorlugit aalajangersarneqarput:

Kapitali 1

Atuuffeqarfia

§ 1. Maleruaqqusami matumani Qeqqata Kommuniani suliffeqarfinni tamani eqqakkanik katersisarnermut aaqqiissutinut, innersuussinissamut aaqqiissutinut aammalu tigussaasumik innersuussinermut malittarisassanik aalajangersaavoq.

Kapitali 2

Siunertaa nassuiaatillu

§ 2. Torersumik eqqakkanik immikkoortiterinissap, mingutsitsinnginnissap aammalu mingutsitsinerit pinngitsoortsinnissap kiisalu eqqakkanik atoqqiisoqarnissap aamma atoqqinneqarnissaannik siuarsaanissap qulakkeernissaa maleruaqqusatigut siunertaavoq.

§ 3. Eqqakkat pillugit Namminersorlutik Oqartussat nnalunaarutaanni qaqugukkulluunniit atuuttumi nassuiaatit maleruaqqusani matumani atuuppoq.

Kapitali 3

Eqqagassaqalersitsisup pisussaaffi

Atuisussaatitaaneq

§ 4. Eqqakkanik katersisarnermut aammalu innersuussinissamut aaqqiissutitut aalajangersakkanik atuinissamut eqqagassaqalersitsisoq pisussaaffeqarpoq.

Imm. 2. Eqqakkat maleruaqqusani allaaserineqanngitsut eqqarsaatigalugit eqqagassaqalersitsisoq kommunalbestyrelsimut saaffiginnissuteqassaaq, taakkulu eqqakkat iginneqarnissaannut erseqqissumik innersuussuteqassallutik. Eqqagassaqalersitsisup eqqakkat iginneqarnissaannut innersuussutaasut atussavai tamatumunngalu atatillugu aningaasartuutit matussusernissaannut kommunip akigititatut aalajangersagai akilertassallugit.

Imm. 3. Eqqagassalerinermut aaqqiissut naapertorlugu eqqakkat immikkoortunut eqqortumik iginneqareernerisa kingorna, eqqagassaqalersitsisoq akisussaajunnaassaaq.

Imm. 4. Suliffeqarfiup nammineerluni eqqakkat navianartut avatangiisinut illersorsinnaasumik aqussinnaallugit qularnaarsinnaappagu, suliffeqarfiup qinnuteqarnerata kingorna, Kommunalbestyrelsi suliffeqarfiup atuisussaatitaaneranik pisussaajunnaarsitsinermik nalunaaruteqarsinnaavoq.

Immikkoortiterisussaatitaaneq

§ 5. Eqqagassaqaalersitsisup eqqakkat immikkoortuni katersisarnermut aammalu innersuussinissamut aaqqiissutini allaaserineqartut naapertorlugit immikkoortitissavai.

Imm. 2. Eqqagassaqaalersitsisup qulakkiissavaa, suliffeqarfimmit eqqagassat immikkoortut pilersinneqartut tamaasa katersuiveqartinneqarnissaat.

Nalunaartarnissamut pisussaaffeqarneaq

§ 6. Eqqagassaqaalersitsisooq eqqagassanik tunniussinermi eqqagassat assigiinngitsut tamaasa nalunaarsussavai.

Imm. 2. Eqqagassaqaalersitsisooq kommunip eqqakkanut nalunaarsuiffiani nalunaarsortissimassaaq kommunillu tigooraavianut oqimaalutaasussamut imaluunniit akiligassap allagartaanik suliarinninnissaaq siunertaralugu annertussutsinik tunniunneqartunik nalunaarsuissamut tunniussinermi saaffiginnissaaq.

Nalunaaruteqartarnissamut paasissutissiisarnissamullu pisussaaffiit

§ 7. Eqqagassaqaalersitsisut kommunalbestyrelsip peqqusineratigut matumani malittarisassat naapertorlugit eqqagassat iginneqarnerini suuneri pillugit paasissutissiisussaataapput.

Imm. 2. Kommunalbestyrelsi eqqagassaqaalersitsisumik akiliisitsinissamut pisinnaatitaaffeqarpoq kiisalu eqqakkat katitigaaneri pillugit, kommunalbestyrelsi eqqakkanik avatangiisitigut isumannaatsumik isumaginninnissaanik qulakkeerinninnissaanut pisariaqartunik paasissutissanik piumaffiginninnaalluni.

Imm. 3. Eqqakkat annertussusaat, katitigaanerat iginneqariaasiallu pillugit missiliutip paasissutissaannik kommunalbestyrelsip piumasaqarneratigut eqqagassaqaalersitsisooq paasissutissiinissaminut pisussaavoq.

Nalunaarutiginnittussaataaneq

§ 8. Eqqagassaqaalersitsisooq eqqakkat mingutsitsinermik kinguneqartussat tamaasa pillugit pissutsini tamani kommunalbestyrelsimut nalunaarutiginnittuussaataavaoq.

Imm. 2. Sapaatip akunneranut eqqagassat annertussusaat sanaartornermi eqqakkanit 50 kubikmeterit qaangerneqarpata, nutaamik sanaartornermut, allanngortitsinermut, nutarterinermut isaterinermullu atatillugu eqqagassat kommunip eqqakkanik tigooraavianut nalunaarutigineqassapput. Piffissami sanaartorfiusumi tamarmi sanaartornermut pilersaarusiordermi eqqakkat annertussusissaat 100 kubikmeterit qaangerneqarpata, sapaatip akunneranut eqqagassat qanorluunniit annertutigissagalarpata, kommunip eqqakkanut tigooraavianut nalunaarutigineqassapput.

Imm. 3. Nunaqarfinni nutaamik sanaartornermut, allanngortitsinermut, nutarsaanermut ingutserinermullu atatillugu eqqagassat pilersinneqartartut, qanorluunniit annertussuseqartigalarpata kommunip eqqakkanik tigooraavianut nalunaarutigineqartassapput.

Imm. 4. Eqqagassaqaalersitsisut eqqakkanik navianartunik pilersitsisartut erseqqissumik innersuunneqarnissaannut tunngatillugu kommunalbestyrelsimut nalunaarutiginnissapput. Nalunaaruteqarnermi eqqakkat suussusaat, poortuutit suussusaat ukiumullu annertussutit naatsorsutigineqartut paasissutissiisutigineqassapput. Kommunip avataanit immikkoortortanit eqqakkat navianartut eqqunneqassappata, tamanna sapaatip akunneri arfineq-pingasut sioqqullugit nalunaarutigineqassapput.

Toqqortarinnittussaataaneq

§ 9. Eqqakkat isumannaatsumik, immikkoortillugit matoqqatillugillu toqqortaritinnissaannut kiisalu eqqaaviit eqqiluisaarnissaannut eqqagassaqaalersitsisooq pisussaaffeqarpoq.

Imm. 2. Eqqakkat toqqortaatigineqartut, matumani eqqakkat mingutsitsisut, eqqiluitsuutitsinngitsut, tipittut assigisaannilluunniit pisut ilanngullugit, erngertumik peerneqarnissaannut kommunalbestyrelsi peqqussuteqarsinnaavoq.

Eqqiluisaartitsisussaataaneq

§ 10. Sumiiffinni inuit namminerisamik atugaanni imaluunniit tamanit tikinneqarsinnaasuni eqqakkanik inissiisoqassanngilaq imaluunniit igitsisoqassanngilaq.

Imm. 2. Pisiniarfinni, neriniartarfinni, imerniartarfinni, niivertarfeeqqani assigisaanilu nerisassanik imeruusaatinillu tuniniaaffiusuni eqqagassaqaalersitsisooq eqqaavilersuissaaq, eqqaaviillu

pisariaqartitsinikkut imaarneqartassallutik kiisalu nunaminertani atugassinneqartuni tuniniaanerup kingunerisaanik eqqakkanit torersuutinneqarnissaat isumagisarissallugu.

Eqqakkanik assartuineq

§ 11. Eqqagassalerineq pillugu nalunaarut naapertorlugu eqqakkanik assartuisartuq eqqakkanik assartuinissaminik kommunalbestyrelsimut nalunaaruteqassaaq.

Imm. 2. Eqqakkanik assartuinerup maanaannartitsinngitsumik peqqinnissamut avatangiisitigullu imminut illersorsinnaasumik ingerlanneqarnissaa eqqakkanik assartuisartumit qulakkeerneqassaaq.

Imm. 3. Eqqakkanik assartuinermi maangaannartitsisoqarpat eqqakkanik assartuisartumit maangaannartissimasat katersorneqassapput. Mingutsitsisoqarpat tamanna erngertumik salinneqassaaq kommunalbestyrelsilu pisumik nalunaarfigineqarluni.

Kapitali 4

Aaqqissuussinerit Assigiinngitsut

Piumasaqaatit nalinginnaasut

§ 12. Aaqqiissutaasuni immikkoortunut aalajangersakkat naapertorlugit eqqagassat immikkoortut iginneqareeraangata aatsaat eqqagassaqaalersitsisup akisussaanaera atorunnaarsinneqassaaq. Kommunilbestyrelsimut siumut isumaqatigiissuteqarnikkut eqqagassat annertussusissaat sinnerneqarsinnaavoq

Imm. 2. Kommunimi sulisunut imaluunniit allamit ingerlatsisumut eqqagassanik tiguisumut eqqakkat annertussusaat imaluunniit suussusaat isumaginninnissamut imaluunniit suliffimmi avatangiisinut ajornartorsiortitsippata, igitsinissamut periarfissamut allamut innersuussinissamut imaluunniit aggorneqarlutik, poortorneqarlutik assingusumilluunniit suliarineqaqqaarnissaannik piumasaqaateqarnissamut kommunalbestyrelsi pisinnaatitaavoq.

Imm. 3. Nunap timaani eqqagassat pilersinneqartut illoqarfimmut imaluunniit nunaqarfimmut assartorneqassapput aaqqiissutaasunilu immikkoortunut aalajangersakkat naapertorlugit tunniunneqassallutik.

Imm. 4. Eqqakkanik maaniinnaq ikuallaaneq inerteqqutaavoq.

Imm. 5. Nunaqarfimmut ataasiakkaanut erseqqissumik allatut innersuussisoqarsimangippat, katersisarnermut aammalu innersuussinissamut aaqqiissutitut nassuiarneqartunut nunaqarfiit aallaavittut ilaapput.

Katersinermi aaqqissuussinerit

§ 13. Katersisarnermut aaqqissuussineri kommunalbestyrelsimut innersuunneqartumut tunniussivimmut imaluunniit katersuivimmut eqqagassaqaalersitsisup eqqagassaatinik igitsinera pineqarpoq. Tamatuma kingorna eqqakkanik isumageqqiinnissamut akisussaaffik kommunalbestyrelsimut tiguneqassaaq.

Imm. 2. Katersisarnermut aaqqiissutip ingerlanneqarnissaa suliffeqarfimmut namminersortumut, igitseerenermi eqqakkat suliarneqqinnissaannik akisussaaffimmik tigusiutigisussamut suliariumannittussarsiuunneqarsinnaavoq. Inatsit atuuttoq naapertorlugu pisuni eqqagassat iginneqarnersut kommunalbestyrelsimut nakkutigineqassapput.

Innersuussineri aaqqissuussinerit

§ 14. Innersuussineri aaqqissuussineri kommunip tigooraaviani, ataatsimoorussamik kommunit eqqagassalerinermik ingerlatsiviani imaluunniit ingerlatsisumit allamit kommunip isumaqatigiissuteqarfigisaanit maleruagassami innersuussinerit naapertorlugit eqqakkat iginneqarnissaat eqqagassaqaalersitsisup akisussaaffigaa.

Imm. 2. Niooqqaanissamut innersuussuteqartup innersuussutigisaa qaqugukkulluunniit eqqagassaqaalersitsisumit malinneqassaaq.

Imm. 3. Eqqakkat kukkusumik immikkoortitikkat piumasaqaatinik naammassinninngitsut imaluunniit maleruagassami matumani aalajangersakkanik allatigut malinninngitsut itigartitsissutigineqarsinnaapput.

Ersarissumik

Innersuussineq

§ 15. Eqqagassat katersisarnermut innersuussisarnermullu aqqissuussinernut atuutereersunut ilaangippata eqqagassaqaalersitsisoq kommunalbestyrelsimut, igitsinissamut periarfissamut ersarissumut innersuussisussamut saffiginnissaaq.

Umiarsualivinni tigooraaviit

§ 16. Maleruagassami matumani aqqiissutit naapertorlugit, umiarsualivinnut peqatigiinnit ingerlanneqartunut peqatigiit eqqagassaqaalersitsisusarput, taamaalillutillu umiarsuarnit, atortulersuutinit qillerivilianiillu eqqagassanik tigooraavimmik pilersitsisussaataapput.

Imm. 2. Imm. 1 naapertorlugu eqqakkanik tigooraanermi, umiarsuarnit, atortulersuutinit imaluunniit qillerivilianit ataasiakkaanit eqqagassaqaalersitsisutut akisussaaffimmik ingerlatsivik tigusissaaq. Tamatuma kingorna eqqagassaqaalersitsisunut piumasaqaatit atuuttut naapertorlugit eqqakkat tiguneqarsimasut kommunip eqqakkanik tigooraavianut imaluunniit kommunit ataatsimoorussamik eqqagassalerinermik ingerlatsivianut ingerlateqqinneqarnissaannik ingerlatsivimmit qulakkeerneqassaaq.

§ 17. Maleruagassami matumani aqqiissutit naapertorlugit, umiarsualivinnut pisortanit ingerlanneqartunut umiarsualiveqarnermut oqartussat kommunalbestyrelsimut isumaqatigiissuteqarnikkut umiarsuarnit, atortulersuutinit qillerivilianiillu eqqagassanik tigooraavimmik pisariaqartinneqartumik pilersitsisussaapput, immikkoortiterisimanissamullu piumasaqaatinik malinnittoqarsimaneramik nakkutiginnissallutik.

Imm. 2. Pisumi matumani eqqagassaqaalersitsisoq tassaavoq umiarsuit, atortulersuutit imaluunniit qilleriviliat ataasiakkaat umiarsualivimmi eqqagassaminnik igitsisut, taakkulu akigitat allattorsimaffiat atuuttoq naapertorlugu eqqagassanut akigitat akilersinneqartassallutik.

Imm. 3. Eqqakkat kommunip ataatsimut ikuaavianut iginneqassasut kommunalbestyrelsimut innersuussutigineqarsinnaavoq.

Kapitali 5

Katersisarnermut aqqiissummut eqqagassat immikkoortut ilaapput

Eqqakkat uumasuneersut

§ 18. Eqqakkat immikkoortunut eqqakkat uumasuneersut, tassa qimmit uumasullu minnerit allat kiisalu pisanit sinnit, soorlu puisimit, arfermit aavermiillu, aalisakkanit aammalu tuttunit umimmannilluunniit eqqagassat ilaapput.

Imm. 2. Eqqaavinnut containeriusunut tamanut atugassanngortinneqarsimasunut imaluunniit kommunip tigooraavianut eqqagassaqaalersitsisoq eqqagassanik igitsissaaq. Eqqakkat pisanut puussiarsuarnut, anartarfilerinermi puussianut imaluunniit eqqagassaasivimmuq ussissumut poortorneqareersimassapput.

Eqqakkat nalinginnaasut

§ 19. Eqqakkat nalinginnaasut tassaapput, illoqtigiinni eqqakkat nalinginnaasut kiserngoruttut soorlu igaffimmi eqqakkat, nerisakut, pappiliakut, plastikkut poortuutikullu, eqqiluisaarnermi eqqakkat soorlu nangit kiisalu piniarnermit aalisarnermillu nammineq atukkanit eqqakkat. Eqqakkanut nalinginnaasunut ilaatigut igalaamerngit, savimerngit batteriillu ilaangillat.

Imm. 2. Eqqakkanut nalinginnaasunut aqqiissummut imaartittarnissamut amerlassusissanik pisariaqartinneqartunik nalunaarsorneqarnissaaq eqqagassaqaalersitsisumit qularnaarneqassaaq, taamaaliornikkut imaarneqarnerit marluk akornanni eqqaaviit ulikkaartoortassanatik. Imaartittarnissamut nalunaarsorneqarneq atorunnaarsitsinerlu kommunip nittartagaatigut, innuttaasunik kiffartuussivikkut imaluunniit immikkoortortani allaffimmuq ingerlanneqassaaq.

Imm. 3. INI-mut attartornermut ilaatinneqartoq eqqarsaatigalugu INI-p, kommunip aamma Namminersorlutik Oqartussat akornanni sullissinissamut isumaqatigiissutaat qaqugukkulluunniit atuuttoq naapertorlugu eqqiluutsuutitsinissamut pisussaaffik aalajangersarneqarpoq.

§ 20. Eqqagassaqaalersitsisoq nammineq eqqakkanut nalinginnaasunut naammattunik eqqaavinnik pissarsissaaq, inissinissamut aserfallatsaaliinissamullu pisussaaffeqarlunittaaq. Eqqagassaqaalersitsisoq

tamatumunnga atatillugu aningaasartuutit nammineq akilertassavai.

Imm. 2. Eqqaavinnut, puussiarsuarnut imaluunniit eqqaavinnut containeriusunut tullinguuttut atuupput:

- 1) eqqakkat peerneqarnissaannut taamaallaat atorpeqassaaq,
- 2) atortunik inngigissunik ipitsunilluunniit poortorsimangitsunik imaqqassanngillat,
- 3) eqqaavik akornutitaqanngitsumik ammarlugu imaarneqarsinnaasussaavoq,
- 4) angallattunut imaluunniit aputaajaanermut akornutaatinnagu inissisimassaaq,
- 5) eqqaavilerisut biiliniut ungasissuseq 50 m.-mik ungasissuseqassalluni kiisalu aqputaa tamaat sinerlugu minnerpaamik 2,5 m.-mik portussusilimmik akornutitaqassanani,
- 6) ukioq naallugu aqqusinermi appakaaffissami ingerlavigineqarsinnaasumut manissumullu inissinneqassasoq,
- 7) tipinik akornusersuinissaa minnerpaaffissaaniitinniarlugu inissinneqassasoq,
- 8) eqqaaviup inissisimaffiata eqqaa eqqiluutsuutinneqassaaq.

§ 21. Eqqakkat nalinginnaasut sapaatip akunneranut ikinnerpaamik ataasiarlugit imaarneqartassapput aamma akulikissusaa eqqarsaatigalugu tipinneranik akornusersuinissaa minnerpaaffianiitissalluni. Sapaatip akunneranut imaartittarnerup amerlinissaanut imaluunniit eqqaaviliussat ilaqqinnissaannut nalunaarutiginnissaannullu kommunalbestyrelsi piunasaqarsinnaavoq.

Imm. 2. Suliffeqarfik imaluunniit paaqqinnittarfik eqqakkanut nalinginnaasunut ilanngussimangitsaq naak pisussaaffugaluartoq, aaqqiissummut ilanngutissasoq kommunalbestyrelsimit aalajangiunneqarsinnaavoq.

Imm. 3. Sisimiuni eqqakkat nalinginnaasut kommunip ataatsimut ikuallaavianut toqqaannartumik igikkiartorneqassapput. Maniitsumi, Kangaamiuni, Atammimmi, Napasumi, Kangerlussuarmi, Sarfanguani aamma Itillimi eqqakkat nalinginnaasut kommunip tigooraavianut igikkiartorneqassapput.

Allunaasaq pituutarlu

§ 22. Allunaasaq pituutarlu atortussianik akoorlugu imaluunniit akoornagu suliat eqqakkat immikkoortunut ilaapput.

Imm. 2. Eqqagassaqalersitsisoq eqqakkanik immikkoortunik kommunip tigooraavianut imaluunniit umiarsualivimmi containerinut inissinneqarsimasunut igitsissaaq. Allunaasat pituutallu 2 meterit sinnerlugit takissusillit tunniunneqannginnerani ammaloqiusanngorlugit imuneqaaqqaassapput.

Qalorsuit, qassutit aamma ningittakkat

§ 23. Eqqakkat immikkoortuni ilaatigut aalisakkanut qassutit, qassutit, ningittakkat qalorsuillu ilaapput.

Imm. 2. Puttaqutillit, kallussaannaveeqqutit, oqimaaluttat allunaasallu akuerineqarsinnaapput, aatsaat qassutini/ningittakkani/qalorsuarni/nettinilu aalajangersagaasimappata.

Imm. 3. Qalorsuit, qassutit ningittakkallu immikkoortiterlugit kommunip tigooraavianut imaluunniit umiarsualivimmi containerinut inissinneqarsimasunut eqqagassaqalersitsisoq igitsissaaq, igitsinnginnermilu oqummersat ass. peersimanissaat qulakkiissallugu.

Kapitali 6

Eqqakkat immikkoortut inniminniinerlut aaqqiissummut ilaapput

Imassat aamma sakkut

§ 24. Imassat, aallaasit, qummoroortut, ajunaalerluni kalerrisaarutit qamutillit imassat suugaluarpataluunniit eqqakkat immikkoortunut ilaapput.

Imm. 2. Siumut nalunaarutigereerneratigut eqqakkat immikkoortut kommunip tigooraavianut eqqagassaqalersitsisumit iginneqassapput. Imassat, aallaasit, qamutillit il. il. atorsinnaasut politiinut tunniunneqassapput.

Betonngi aamma qarmakkat

§ 25. Betonngimit eqqakkanut betonngi saviminernik qajannaallisaataanik anillangasortaqqanngitsut qarmakkallu tassaasut ass. qarmasissiat, marraat aamma multipladit ilaapput.

Imm. 2. Betonngit saviminernik qajannaallisaataasa annerpaamik 2 cm.-imik anillanganerat, betonngit eqqakkat annerpaamik 2 meterimik annertussusilerlugit aserorterneqarsimanissaat kiisalu PCB-mik imaqarnerat 0,1 mg./kg.-mit annikinnerunissaa siumut qulakkeeqqaarlugu, eqqakkat immikkoortut kommunip tigooraavianut eqqagassaqalersitsisoq igitsissaaq.

Eqqakkat toqqorneqarsinnaasut akuleriit

§ 26. Eqqagassat immikkoortunut allanut ilaangitsut eqqakkat immikkoortunut ilaapput, ilaatigut marraasinnaapput, marriat, vinylit, tarrarsuutit flise-llu.

Imm. 2. Eqqagassat annerpaamik 2 meterimik annertussusilerlugit aserorterneqarsimanissaat siumut eqqagassaqalersitsisumit qulakkeerneqariarlutik, kommunip tigooraavianut eqqakkat immikkoortut igissavai.

Eqqagassat

Ikuallassinnaasut

§ 27. Eqqagassat ikuallatassat tassaapput eqqagassat ikuallassinnaasut, immikkoortiterneqartariaqangitsut, toqqortarineqarnissaannut imaluunniit immikkut isumagineqarnissaannut piumasaqaataasumut ilaangitsut aammalu toqqaannartumik atoqqiinissamut naleqqutinngitsut. Ilaatigut puukut, plastikkit pequtillu aseqqukut pineqarput.

Imm. 2. Eqqagassaqalersitsisup eqqakkat ikuallatassat kommunip tigooraavianut igissavai, aamma eqqakkat tunniunnerini imerpalasortaqaassanngillat imaluunniit takissusaaq 1,5 meterit qaangissanngilaat.

Imm. 3. Kommunalbestyrelsi kommunip ataatsimut ikuallaavianut sequtserivummut piumasaqarluni innersuussutitalimmik eqqakkat tunniunneqartassasut innersuussuteqarsinnaavoq.

Sanaartornermi atortut

§ 28. Sanaartornermi atortut eqqagassat nutarterinermi, nutaamik sanaartornermi imaluunniit ingutserinermi pisuupput, ilaatigut qalissiaasinnaallutik, gipsiusinnaallutik imaluunniit kiffiutaasinnaallutik.

Imm. 2. Sanaartornermi atortut eqqagassaqalersitsisumit kommunip tigooraavianut iginneqassapput, iginneqannginnerinilu assersuutigalugu kikissat qinnerillu piarneqarsimanissaat qulakkeersimassallugu.

Toqqaannartumik

Atoqqiineq

§ 29. Toqqaannartumik atoqqiinerit tassaapput pequtit atugassat, pequtit assigisaallu suliareqqinneqaaqaaratik atorneqarsinnaasut.

Imm. 2. Pequtit atoqqinneqarsinnaasut kommunip tigooraavianut imaluunniit toqqaannartumik atoqqinneqarsinnaasunut tamanit tikinneqarsinnaasunut containerinut eqqagassaqalersitsisumit peerneqassapput.

Assakaasut

§ 30. Assakaasukut tassaapput assakaasut qalequtai ilivitsut imaluunniit ilaannakui angallassissutinit assakaasulinnit tamaneersut.

Imm. 2. Assakaasukut kommunip tigooraavianut imaluunniit kommunip isumaqatigiissuteqarfigisaanut ingerlatsisumut allamut eqqagassaqalersitsisumit tunniunneqassapput, tunniussinnginnermilu assakaasut saviminertaasa peerneqarsimanissaat qulakkeersimassallugu.

Eqqakkat navianartut

§ 31. Eqqakkat navianartut tassaasinnaapput akoorutissat, uuliakoq, pære sarfamik sipaarutilik, akkumulatorit, lysstofrøri, qalipaait sinnikui, batteriit, avatangiisinut ulorianartunik eqqagassanut poorinikuusimasat, qarasaasiat, printerit, isiginnaarut, oqarasuaatit, sannatit innaallagiatortut, pinngussat

elektronikkusut, igaffimmi errorsisarfirmilu atortorissaarutit, qisuk aanaveersaasigaq, eqqagassat asbestinik akullit, eqqagassat PCB-mik akullit aammalu eqqagassat aatsitassanik oqimaatsunik akullit

Imm. 2. Eqqagassat asbestinik, PCB-mik aatsitassanillu oqimaatsunik akullit kapitali 7-imi tulliuuttumi nassuiarneqartutut ersarissumik innersuussinermik aaqqiissummut ilaapput.

Imm. 3. Eqqagassat navianartut kommunip tigooraavianut eqqagassaqaalersitsisumit tunniunneqassapput, tunniunneqannginnerinilu tulliuuttutigit immikkoortinneqarnissai qulakkiissallugu:

- 1) Elektronikkut eqqagassat.
- 2) Igaffimmi errorsisarfirmilu atortut
- 3) Kemikaaliat
- 4) Qalipaait, lakkit, limit, fugemasset naqiterinermilu qalipaait.
- 5) Uuliakoq, tassa uuliakoq sunaluunniit
- 6) Akkumulatorit aamma batteriit.
- 7) Poorisat silaannarmik naqitsinermik imallit.
- 8) Qisuk aanaveersaasigaq.

Imm. 4. Pisuni tamani eqqagassaqaalersitsisup eqqagassat navianartut tulliuuttutigit poortorsimanissaat qulakkiissavaa:

- 1) puut eqqiluutsut, ussittut matoqqasullu,
- 2) pooreqqaarisaa imaluunniit imarisaanik ersarissumik nalunaaqutsersimasooq, imaluunniit
- 3) eqqagassanut navianaatilinnut assigiinngitsunut assigiinngitsunik pooqartitsineq.

Imm. 5. Nunaqarfinni eqqagassat avatangiisnut navianaatilinnik aallertoqarnissaanik isumaqatiginninniarluni imaluunniit kommunip tigooraaviani immikkoortiterneqarnissaanut eqqagassaqaalersitsisooq vejformandimut attaviginnaavoq.

Igalaaminikut

§ 32. Igalaaminikuni igalaamerngit puutut atornerqarsimasut pineqarput, matumani viinnit puuiaasat, paarnat simersiat puui, nerisassanik assigiinngitsunit puut igalaamerngit, igalaamerngit aseqqukut assigisaallu kiisalu pequtit annertunerusut soorlu tarrarsuutit, nerriviit igalaaminusut igalaallu igalasserfeqanngitsut ilaallutik.

Imm. 2. Eqqagassat kommunip tigooraavianut eqqagassaqaalersitsisumit tunniunneqassapput.

Saviminikut saffugassakullu

§ 33. Saviminikut saffugassakullu ilaatigut tassaapput sikkilip timitaa, ilisiviit saffugassanit sanaat, ruujorit imaluunniit inuussutissarsiornermik sanaartornermit, ingutserinermit imaluunniit nutarterinermit savimerngit saffugassallu kiisalu puukut soorlu qillertuusat, immiaaqqat sodavandillu qillertuusat ilaapput.

Imm. 2. Saviminikut saffugassakullu kommunip tigooraavianut imaluunniit kommunip isumaqatigiissuteqarfignisimasaanut ingerlatsisumut allamut eqqagassaqaalersitsisumit tunniunneqassapput. Tunniussinnginnermi eqqagassat aserorterneqarsimanissaanut annertunerusumik tigooraavimmi piumasaqaateqartoqarsinnaavoq.

Eqqakkat angisuut

§ 34. Eqqakkat angisuut immikkoortuni pisattat annertunerusut pineqarput, assersuutigalugu allaffimmi pequtit, sikkilit, savimerngit, saffugassat, dunkit, madrassit kiisalu igaffimmi errorsisarfirmilu atortut tassaasut nillartaartitsiviit, qerititsiviit, kissarsuutit, errorsiviit, erruviit, microbølgeovnit il.il.

Imm. 2. Eqqakkat angisuut kommunip tigooraavianut eqqagassaqaalersitsisumit tunniunneqassapput.

Qisuit

Igitat

§ 35. Qisuit igitat ilaatigut tassaapput sallilikkat issusuut, sallilikkat, quassuttuut, pladit imaluunniit listit qalipaannakkat imaluunniit qaaginnaasigut suliarisat, aamma sanaqqitatut imaluunniit atoqqitassatut atornerqaqqissinnaanngitsut.

Imm. 2. Qisuit naqitat eqqakkat navianartunut ilaatinneqarput, takuuk § 31, imm. 3, nr. 8.

Imm. 3. Qisuit eqqagassat kommunip tigooraavianut eqqagassaqaalersitsisumit tunniunneqassapput, tunniunneqannginnerinilu betonngitai, marraasersuinerit, kikissat, qinnerit, qalequt assigisaallu

piiarsimanissaat kiisalu qalipaata aatsitassamik oqimaatsumik akoqannginnissaa qulakkeeqqaassallugit. Qisuit eqqagassat tunniutinnginnerini 2 meterinit takinerutinngit aserorterneqqaassapput.

Imaatigut angallassissutit qamutillu motoorillit nutaanngilivallaarsimasut

§ 36. Eqqakkat immikkoortuni imaatigut assartuussinissamut angallatit, matumani umiatsiat, umiarsuit, umiatsiaaqqat aammalu umiaasaaqqat kiisalu nunakkut assartuussinissamut qamutit, matumani biilit, qamuteralaat ATV-llu pineqarput.

Imm. 2. Eqqagassaqaalersitsisup tunniussinnginnermi kommunimi avatangiisinut tunngatillugu malittarisassat naapertorlugit imaatigut angallassissutit imaluunniit qamutit motoorillit avatangiisinut tunngatillugu isumannaarsimanissaat qulakkeerneqassapput. Avatangiisitigut piareersarneqarsimanngippata tigujuananeqassanngillat imaluunniit eqqagassaqaalersitsisoq akigititanut allattorsimaffik naapertorlugu piffissaq atornerqartoq aallaavigalugu annertunerusumik akiligassinneqassaaq.

Imm. 3. Imaatigut angallassissutit imaluunniit qamutit avatangiisitigut piareersarneqarsimasut eqqagassaqaalersitsisumit kommunip tigooraavianut tunniussissaaq, tassunnga atatillugu avatangiisitigut piareersarneqarsimaneranik uppernarsaammik takutitsisoqassalluni. Nunaqarfanni illoqarfimmut qaninnerpaamut tigooraavimmut tunniussineq ingerlanneqassaaq. Annertunerusumik aserorterneqarnissaanut piumasaaqateqartoqarsinnaavoq.

Imm. 4. Imaatigut angallassissutinik imaluunniit qamutit nutaanngilivallaartut avatangiisinut navianartunik atortoqaraluarpata atortoqanngikkaluarpataluunniit, illoqarfimmi pinngortitamullu qimaannarneqarnissaat inerteqqaavoq.

Kapitali 7

Eqqagassat immikkoortortat erseqqissumik innersuussinermut ilaapput

Eqqakkat Asbestitallit

§ 37. Eqqakkat immikkoortortanut eqqagassat asbestitallit suulluunniit ilaapput, ilaatigut qaliami, natermi, silaannarissarfii aqqaataanni, cementinik ruujorini, marraasersuutini aammalu qeqoq qarmamut qallitit kiisalu iikkersuutini qilaamullu qallitit nassaassaasarlutik.

Imm. 2. Sanaartukkanik atortulersuutinillu 1950-1977-ip nalaanni sanaartugaasunik, 200 m²-mit annertunerusunik imaluunniit 10 tons sinnerlugu annertunerusunik eqqakkanik pilersitsiviusunik isaterinnginnermi imaluunniit nutarterinnginnermi, eqqagassaqaalersitsisoq eqqakkanik passussinissamut pilersaarummik imaqartumik suliaqarnissamut kommunalbestyreldimut attaveqassaaq.

Imm. 3. Tigooraavimmut innersuunneqartunut eqqagassaqaalersitsisoq tunniussinnginnermi, suulluunniit asbestimik akullit isugutatsillugit toqqortaritinneqarnissaat kiisalu ussissumik matoqqasumik aammalu asbestimik akullimik imaqarneranik ersarissumik nalunaqqutsersimasumik poortorneqarsimanissai qulakkiissavaa.

Imm. 4. Isaterinerup imaluunniit nutarterinerup naammassinerata kingorna, eqqakkat eqqagassalerinermut pilersaarut akuersissutigineqartoq naapertorlugu ingerlatsisoqarsimaneranut uppernarsaatinik eqqagassaqaalersitsisoq kommunalbestyreldimut nassiuussissaaq.

Issoq mingutsinneqarsimasooq

§ 38. Eqqakkat immikkoortuni issaq avatangiisinut imaluunniit peqqissutsimut navianartunik akulik, avatangiisinik mingutsitsinnaasutut imaluunniit innuttaasut peqqissusaannut aarlerinartortaqrarneranik takussutissartaluk ilaavoq.

Imm. 2. Issaq mingutsinneqarsimasup nuunneqarnera eqqagassaqaalersitsisumit kommunalbestyreldimut, igitsinissamik periusissamik innersuussuteqartumut nalunaarutiginnissaaq. Igitsinissamik periusissamik innersuussisoqartinnagu issaq mingutsinneqarsimasooq iginneqassanngilaq.

Imm. 3. Tunniussinnginnermi issaq ujaraajaqqaarneqassaaq.

Imm. 4. Tigussaasumik itigartitsineq naapertorlugu eqqagassaqaalersitsisumit issaq mingunnikoq igissavaa. Akigititat atuuttut naapertorlugit eqqagassaqaalersitsisoq issumik mingunnikumik tunniussinermi akiliuteqassaaq.

Eqqakkat PCB-mik akullit

§ 39. Eqqakkat immikkoortumi eqqakkat PCB-mik akullit tamarmik pineqarput, taakkulu amerlanertigut marraasersuutini tasisaartuni, sininik matussusiisunik aammalu igalaat iluneq ajortunut marraasersuutini, qalipaatinu assigiinngitsuni, ini masattuleriffinni ussissaatini, naternut marraasersuutini aammalu oqorsaatit uuliaanni nassaassaasarlutik.

Imm. 2. Sanaartukkanik atortulersuutinillu 1950-1977-ip nalaanni sanaartugaasunik, 200 m²-mit annertunerusunik imaluunniit 10 tons sinnerlugu annertunerusunik eqqakkanik pilersitsiviusunik isaterinnginnermi imaluunniit nutarterinnginnermi, eqqagassaqaalersitsisoq eqqakkanik passussinissamut pilersaarummik imaqartumik suliaqarnissamut kommunalbestyrelsimut attaveqassaaq aamma isaterinerup imaluunniit nutarterinerup naammassinerata kingorna, eqqakkat eqqagassalerinerup pilersaarut akuersissutigineqartoq naapertorlugu ingerlatsisoqarsimaneranut uppernarsaatinik kommunalbestyrelsimut nassiussissaaq.

Imm. 3. Sanaartukkanut 200 m² mikinerusunut aammalu ilaqutariit ataatsit marlulluunniit illuini PCB-mik akoqarsinnaasut pingaarnerit eqqakkatut navianartutut passunneqassapput iginneqarlutillu.

Imm. 4. Eqqagassaqaalersitsisup tigooraavimmuut innersuunneqartumut tunniussinnginnermi qulakkiissavaa eqqakkat PCB-nik akullit pujoralannut ussittumut matoqqasumullu erseqqissumik PCB-mik nalunaaqutsersimasumut poorsimanissaat, aamma eqqakkanut allanut navianartunut imaluunniit naviananngitsunut akuliutinnginnissaat imaluunniit kimikillitinnginnissaat.

Imm. 5. Eqqagassaqaalersitsisut namminneerlutik eqqakkat PCB-mik akullit nunamut allamut arrortigassanngorlugit nassiussinissaannut kommunalbestyrelsi akuersissuteqarsinnaavoq. Tassunnga atatillugu eqqortumik isumaginninnissamut poortuinissamullu eqqagassaqaalersitsisoq nammineq akisussaasuvoq.

Issumi PCB

§ 40. Isaterinermi imaluunniit annertuumik nutarterinermi, illup silataanut qalipaatinu PCB-mik 50mg/kg-mit annertunerusunik akullit imaluunniit silatimikkut marraasersuutit PCB-mik 1.000 mg/kg-mit annertunerusunik atuisoqarsimatillugu illuutit sanaartukkalluunniit eqqaani nuna eqqagassaqaalersitsisumit misissorneqassaaq.

Imm. 2. Eqqakkat PCB-nik akoqarnerat paasineqarpat kommunalbestyrelsi sukumiinerusunik paasissutissinneqarnissamut aamma eqqakkat pillugit innersuunneqarnissamut atatillugu saaffigineqassaaq.

Eqqakkat aatsitassanik oqimaatsunik akullit

§ 41. Eqqakkanut immikkoortunut eqqakkat aatsitassanik oqimaatsunik sunilluunniit akullit tamarmik pineqarput, matumani Aqerloq saffugassatut pissusilik, Arsen, Cadmium, Kromi, Kanngussaq, Kviksølvi, Nikkeli aamma Zinki assersuutigalugu qalipaatinut, cementimut, qalliutinut, qisunnut asiunaveersaasikkanut imaluunniit qinngornernut illersuutissanut atorneqarsimasut ilaapput.

Imm. 2. Eqqakkat aatsitassanik oqimaatsunik akoqarnerat paasineqarpat kommunalbestyrelsi sukumiinerusunik paasissutissinneqarnissamut aamma eqqakkat pillugit innersuunneqarnissamut atatillugu saaffigineqassaaq Illuutinik 1. januar 2005 sioqqullugu sanaartugaasunik ingutserisussanik imaluunniit nutarterisussanik eqqagassaqaalersitsisunut aaqqiissut pingaarnertut tunngassuteqarpoq.

Kapitali 8

Akitsuutit

§ 42. Katersisarnermut aammalu innersuussinissamut aaqqiissutinut ataasiakkaanut eqqagassalerineruput atatillugu kommunimit aningaasartuutigineqartunik matussusiisussanik kommunalbestyrelsi akiliutissanik aalajangersaassaaq. Akiliutit ukiumut naleqqussarneqartarput eqqagassalerinerumullu Qeqqata Kommuniani akigititanut allattorsimaffimmi, kommunip nittartagaani tamanit takuneqarsinnaasuni takuneqarsinnaasarlutik.

Imm. 2. Eqqakkat illoqarfimmi, nunaqarfimmi nunap timaaniluunniit pilersinneqaralarpata eqqagassaqaalersitsisut tamarmik akiliuteqartassapput.

Imm. 3. Eqqakkanut nalinginnaasunut tunngatillugu eqqagassaqaalersitsisoq nuunnermi imaartittarnissamut nalunaassaaq aammalu nooqqinnermi aaqqiissutip atorunnaarsinnissaanut

nalunaaqqissalluni. Nalunaarnerit kommunip nittartagaani ingerlanneqassapput. Nuunnermi atorunnaarsitsinissamik nalunaartoqanngippat, eqqagassaqaalersitsup allap nalunaarnissaata tungaanut eqqagassaqaalersitsisuugallartutut nalunaaqqasoq akiliisussaataavoq.

Imm. 4. Eqqakkat eqqortumik immikkoortiterneqarsimangippata, akit allattorsimaffiat atuuttoq naapertorlugu kukkusumik immikkoortiterinermi akiliuteqartitsisoqassaaq.

Imm. 5. Imaatigut angallassissutit qamutillu motorillit tunniunneqarnerini avatangiisinut piareersarneqarsimangippata, piareersaanermut aningaasartuutit matussuserneqarnissaannut akitsuuteqartinneqassapput.

Kapitali 9

Nakkutilliineq

§ 43. Qeqqata Kommuniani Teknikkimut Avatangiisinullu immikkoortortaarfik nakkutilliisussaataasuvuq.

Imm. 2. Nakkutilliisussaataasooq avatangiisit pillugit inatsimmi § 47 naapertorlugu suliffeqarfimmik eqqagassalerisunik nakkutilliartornissaq siunertaralugu suliffeqarfimmut appakaannissaminut, appakaannginnermi piffissaq sioqqullugu eqqagassaqaalersitsisumik kalerrisaareqqaassaaq.

Kapitali 10

Naammagittaalliutit

§ 44. Matumani maleruaqqusat naapertorlugit aalajangiinernut naammagittaalliutit uunga nassiuunneqassapput Qeqqata Kommunian, Teknikkeqarnermut Avatangiisinullu immikkoortorta, e-mail qeqqata@qeqqata.gl-ikkut imaluunniit allakkatigut.

§ 45. Kommunalbestyrelsip aalajangiineri avatangiisit pillugit Inatsisartut inatsisaanni kapitali 14-imi Avatangiisinik illersuineq pillugu malittarisassat naapertorlugit Naammagittaalliuteqartarfimmut naammagittaalliutiginneqarsinnaapput.

Kapitali 11

Kinguneqartitsinerit

§ 46. Kalaallit Nunaanni pinerluttuleringeq pillugu inatsimmi malittarisassat naapertorlugit akiliisitsinikkut eqqagassaqaalersitsisumut pineqaatissiisoqarsinnaavoq:

1) § 5, imm. 1, aamma § 9, imm. 1-imi eqqakkanik immikkoortiterinissamut imaluunniit uninngasuuteqarnissamut piumasaqaatinik malinninngitsoq.

2) § 18, imm. 2, § 20, imm. 1 aamma 2 § 21, imm. 3, § 22, imm. 2 imaluunniit § 23, imm. 3-mi katersuinissamut aaqqiissutitut aalajangersakkanik malinninngitsoq

3) § 24, imm. 2, 1. pkt., § 25, imm. 2, § 26, imm. 2, § 27, imm. 2, § 28, imm. 2, 30, imm. 2, § 31, imm. 3 aamma 4, § 32, imm. 2, § 33, imm. 2, § 34, imm. 2 imaluunniit § 35, imm. 3-mi innersuussinissamut aaqqiissutitut aalajangersakkanik malinninngitsoq.

4) § 37, imm. 2 - 4, § 38, imm. 2 - 4, § 39, imm. 2 - 4, § 40, imm. 1 aamma 41, imm. 2-mi igitsinissamut aaqqiissutitut tigussaasumik innersuussinermi piumasaqaatinik malinninngitsoq.

Kapitali 12

Atuutilersitsinerimut atorunnaarsitsinermullu aalajangersakkat

§ 47. Malittarisassat uku ulloq 1. september 2025-mi atuutilersinneqarput.

Imm. 2. Tamatumani saniatigut Sisimiut Kommuniani igitassanik eqqaanermut maleruaqqusaq 6. februar 1996-imeersoq, Sisimiuni, Sarfanguani Itillimilu eqqagassalerinermut malittarisassiat 6. februar 1996-imeersoq aammalu Sisimiut Kommuniani uuliakunik akuutissanillu eqqakkat iginneqarnissaannut maleruaqqusaq 6. februar 1996-imeersoq atorunnaarsinneqassapput.

Taamaalilluni Qeqqata Kommuniani kommunalbestyrelsanit ulloq 26.juuni.2025 akuerineqarpoq.

Malik Berthelsen (atsio.)

Borgmester

Taamaalilluni angerlarsimaffinni inoqutigiinnit Qeqqata Kommuniani eqqakkanut maleruaqqusaq
atuuttussanngortinneqarpoq

Namminersorlutik Oqartussat, ulloq 4 juuli 2025

Bentiarq Ottosen (atsio.)

Isumaginninnermut, Suliffeqarnermut, Nunamut Namminermut Avatangiisinullu Naalackersuisoq

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalackersuisut